

山雷我師命題

重訂中風漸詮

受業蘭谿汪澂


重訂中風斟銓三卷

丁巳秋仲初稿

上元壬戌浙江蘭谿中醫專校石印再板

中元壬申季秋重訂第三板

癸酉三月鉛字校定印刷竣工



證印人作著

承印者 蘭谿協記書莊印刷部

著者兼
發行者

蘭谿中醫學校張山雷

每部兩冊實價國幣銀圓兩圓伍角
壹次購伍部者隨贈壹部多購類推

嘉定張山雷五十八歲肖像



福建中医学院图书馆

文书室

腦神經病及精神情志病
古今醫案平議嗣即續出

重訂中風斟詮高序

醫生者。醫病者也。醫書者。指導醫生以醫病。且以醫醫生之病者也。病人之生死機緘。操於醫生筆下。而醫生之或致草菅人命。大率由所讀醫書。有以誤之。然則醫生殺人。律當以從犯論罪。而主犯宜歸獄於著書之人。國醫著作。奚啻萬千。言之成理者固多。然按方投劑。能有效驗者幾何。能不誤人者又幾何。醫學之書。有關生命。寧不重歟。傳云。太上有立德。其次有立功。其次有立言。惟是醫家之言。卽所以立功立德。其言而當。生死肉骨。非功德而何。神農本經。軒岐靈素。實爲國醫鼻祖。微言精義。後學南鍼。於是乎在。獨是年湮代遠。言之不詳。學子研求。難尋端緒。仲景之時。去古未遠。傷家族之死亡。憫民生之疾苦。乃本靈素。而著傷寒論。蓋因病而求治法。辨證以立論方。其證多者。則論精而詳。其證少者。則言簡而略。若傷寒論中之所謂中風。則爲發熱汗出惡風脈緩之證。實卽後世之所謂傷風。外感風邪。其見證且較傷寒爲輕。與素問之中

風名義。同條共貫。是以本論六經。皆有中風之條。都屬尋常外感。非後世所謂昏厥暴仆。氣蠱脈大之中風。可以並論。不謂金匱以降。竟以辛溫發散之法。療治猝然昏仆之大厥。二千年來。訛以傳訛。牢不可破。雖曰求魚緣木。似無後災。豈知救火抱薪。頃刻灰燼。漫漫長夜。聽盲人瞎馬以馳驅。芸芸羣生。含續命愈風而物化。乃相率而委之病不可治。吁。其果不可治乎。僕早年從淮安高映清先生游。先生爲淮上名醫。踵師門而求治者。日恆數十百人。中風之證。固數數見之。而難期速效。師嘗謂門人曰。最難治者惟中風。雖古人亦無良法。然投以清平涼降。似較諸辛溫發越爲佳。逮僕臨證以來。迄今又二十餘載。凡治中風。悉本先師遺法。雖無大誤。然捷驗難言。覺恆有不慊於心者。十年前。由上海千頃堂書局。購到嘉定張山雷先生所著之中風辯詮兩冊。讀其序言。已覺如有所悟。及將全書讀竟。則心胸開朗。二十載疑團。一朝冰釋。不禁拍案大叫曰。何張氏多醫。古今病理。多由一家發明耶。仲景著傷寒金匱。爲萬世法。伯龍類中祕

旨。足以補仲景之遺。今得山雷氏推闡詳明。發揚而光大之。又足以補伯龍之未備。是當與傷寒金匱。鼎足而三。第以推翻古書成說。并金匱而猶有懷疑。似乎清夜捫心。不無駭詫。但每遇癱瘓抽搐。昏瞢痙厥等證。悉以介類潛鎮法。小試其端。多能隨手有效。僕乃幸得能治中風之名。而求治者亦日益多。年來斯疾之獲愈者。大小證當以百計。其中病勢之重且久。而治驗之奇且捷者。得兩人焉。

一爲徐州南門外益泰棧蕭子青君。年五十。素勞擘畫。體豐痰多。忽然昏瞢暴仆。兩目失明。氣促涎流。危在旦夕。邀僕至時。晨曦初上。脈則滑數洪大。欲視其舌而不可見。面色緋紅。喉聲曳鋸。舉家哭泣。以爲恐無生望。僕急授以潛鎮大劑。方用三甲合龍齒石決白芍。佐以二至桑菊等物。覆杯得安。午後略加冬地玄丹甘寒之品。連進兩劑。次日目明舌和。語言清析。調理兩月。竟以漸愈。一爲徐州西鄉郝寨郝可亭之子。十二歲。病兩載有餘。每晨睡眠將醒之際。必癱瘓抽搐。昏不知人者。約半小時。口流涎沫。角弓反張。無間寒暑。晝日雖如常態。

。終是機鈍神呆。郝家道有餘。中西醫診治殆遍。見徐州民報與新徐日報。有登載僕之醫話者。特跋涉來城求治。縷述經過情形。視其色則萎黃。按其脈則滑數。目藍而光滯。舌膩而邊紅。舊說所謂肝陽挾痰熱上擾。亦卽今之所謂血冲腦也。卽授以潛鎮清平。略佐化痰爲劑。方用生牡蠣生石決明各一兩。蛤黛散青龍齒各五錢牛蒡子括蕁子各三錢。桑菊竹茹絲瓜絡蘇子霜各一錢五分。一劑甫投。病卽不發。大便略解痰涎。其父喜曰。藥果效矣。能保持悠久乎。先生何其神也。僕曰。姑且待之。原方進退。連服三十劑。繼又改作膏丸。調理半載。於今數年。竟未一發。以上兩證。僕所以不用羚羊者。非不知羚羊獨入厥陰。較易獲效。因近時價貴。動須一二十金。中人家。不易措辦。僕平生立願。不用貴藥。故竟毅然屏除。雖似矯枉。然此心當邀天鑒。但能效驗依然。並非無羚羊而不可者。世或因其昂貴而重視之。僕爲揭明斯旨。則貧窮者受惠良多。僕每因人過譽。轉覺自慚。不敢攘人之功。以爲己力。恆對譽我者曰。治愈斯疾。非僕之能。乃

張伯龍張山雷兩先生之所教。常以中風斟詮。出示朋輩。而遇知識界中談斯疾者。必囑其速購此書。蓋此書不獨醫病人之病。且以醫醫生之病矣。僕昔年不能速愈是證。是卽僕之一病。今得此書醫之。而僕之病愈。而病中風之病者。更可以速愈。飲水思源。是皆伯龍山雷兩先生之所賜。惟伯龍先生。去今稍遠。空殷慕蘭之思。而山雷先生。又相隔迢遙。莫遂識荆之願。兩投尺素。都被誤於浮沈。一縷丹忱。時縈懷於夢寐。壬申十月。通函蘭谿協記書莊。探詢山雷先生近著。遂得先生手字。紅雲一朵。不啻天外飛來。更聞中風斟詮。重訂行世。不禁喜極。致郵索取。并述相慕之殷。以及僕受此書之益。承以書來。囑爲作序。附以重訂本之一二兩卷。細讀一過。則理論精詳。益臻完善。中風病之證治。歎觀止矣。又聞有腦神經病古今醫案平議之輯。將來可稱璧合珠聯。僕嘗見今日醫林著作家多矣。如夫己氏輩晦僻怪誕。毫不可解。及附會新學說。非馬非驢。不足評論者外。上焉者。或多文章侗儻。而方藥無靈。理論精詳。而實驗難必。求其效如

桴鼓。捷於影響。若是書者。曾不可多覩。僕乃是書實驗之人。敢作負責介紹之語。先生此作。絕非欺人之空論。更非如投機事業。思以牟利者所可等視。可謂祖述素靈。繼往開來。一則佳話。爰以讀是書之經過。序述如右。以告同人。僕草茅下士。人微言輕。非搢紳名流。借一題詞。可爲篇幅增光者比。且山雷先生之體仁堂醫書。久已不脛而走。又何待僕之揄揚。且僕與先生。尙無一面之緣。更非曲阿之好。良由獲益於心。不覺形之於筆。有如骨梗在喉。哇而始快。僕爲此序。乃序述所得此書之助力。作報告實錄。見此者其弗以爲恭維酬應一派可也。時民國二十一年壬申仲冬神交教弟白下高行素序於徐州寓廬之行素軒

重訂中風斟詮自序

拙編中風斟詮於壬子仲春乍見伯龍氏類中之論心有所悟遂以屬稿迨至丁巳整理甫就戊午八月包君識生以神州醫藥總會名義創辦神州中醫學校於滬上其時醫會麤具雛形醫校成立僅賴包君奔走得會中同人解囊相助草昧經營遽而開課講堂資料倉猝無徵猥承下問諄囑贊襄乃以此稿授之遂有醫校之鉛字本是爲拙編殺青之始洎乎庚申來遊蘭谿加以潤飾於壬戌歲用石印法再付手民辱承同好聞而函索五六年間竟以告罄然問訊者猶復相屬竊念此編雖僅屬國醫學理之一端而確有徵驗藉以遠紹上古神聖心傳是國學存亡絕續一大證據不佞治醫卅餘載惟此差足以貢獻社會稍能補救民生疾苦當思推廣以期及遠但原本第一卷之十四節論慢脾風病理疑是陰氣上沖亦能使腦神經變化一條似乎語太鑿空不若以陽不布護不能養腦立論較爲切近顯明用是更爲修正并補入此病未發之前必有先兆一條俾得防患未然病家醫家俱可作曲突徙薪之計是卽古人所謂上工之治未病爰以重訂爲名更以問世惟期海內賢明匡其未

逮而有以教之又最近五年來發生一種時疫病起頭痛腦後痛身有大熱面目俱赤且多嘔吐旋即昏不知人咬牙蹙厥或爲角弓反張呼痛不徹或竟不言不動無臭無聲最速者數小時而就斃其次亦三五日七八日告危國醫幾於無可措手而新學家則名以腦脊髓膜炎揆度病情蓋亦氣火陡升腦神經之變動乃彼之學者則謂與血沖腦絕端不可同論誠以彼之顯微鏡裏分析細微驗得血液形態既有岐異自當別有研究初無大處落墨提挈綱領以探其源之例不佞所見是證雖最危者誠無挽救之術然常用大劑白虎及紫雪一類治愈多人而同道中之循用是法者亦頗有驗觀其目赤顴紅頭痛如破脣焦且滿脈大勁弦氣火升騰發揚激越血升沖腦蓋亦信而有徵但含有傳染性質是爲時行之厲氣滬上神州醫藥總會定以疫瘧爲名差爲有據惟此證之獲愈者熱漸退時多有兩頤脣頰項側發出顆粒紅瘰或如水痘者苟得此瘰卽無反復可見陽明少陽鬱火得泄裏熱自解此雖與類中之血沖腦者見證不盡合符然其爲氣火上衝則理無二致附書所見就質通方或亦舉三反二之一助云爾

癸酉仲春張壽頤山雷甫自識於蘭谿城中福山之麓

中風斟詮張序

吾華醫學。昉於上古。盛於漢唐。論雜病者。自素問以降。莫不以仲景金匱。玄晏甲乙。巢氏病源。孫氏千金。王氏外臺諸家爲軌範。誠以漢唐家法。辨證論治。具有精義。可爲萬世不易之法守。不比宋金元明諸書。時以泛濫空言。充篇幅。作皮相語也。獨至中風一證。昏厥暴仆。無非肝陽不靖。生風上揚。而證以古書。則此是內動之風。素問本不在中風之例。至金匱甲乙而始謂之中風。方且皆以爲外感之寒風。則與肝氣自旺。火盛風生之義。枘鑿不合。而後之作者。無不祖述金匱。皆以外風論治。疏風散寒。習爲常例。千金外臺。方藥最夥。辛散溫升。如出一手。直至河間丹溪之論出。而始知爲火爲痰。病屬內因。本未嘗感觸外來之邪風。然議論雖互有發明。而所述治法。猶戀戀於古人續命諸湯。終不能爲內風昭示正軌。蓋識病之誤。已在漢唐諸大家。則後之學者。縱有覺悟。亦不敢大放厥辭。直挾古人之謬。而是病之誤爲古書束縛。固已二千年矣。近數十載。歐風東漸。新學大昌。其論此病。謂是血沖腦經所致。但就

其病名言之。豈不與國醫之所謂中風者。分道而馳。不可強合。然蓬萊張氏伯龍雪雅堂醫案。則據素問血之與氣并走於上。則爲大厥一節。謂卽肝火自熾。生風上揚。迫令氣血上逆。沖激入腦。震動神經。而失其知覺運動之病。融會中西學說。以闡明此病之淵源。信而有徵。同條共貫。可爲中外醫學溝通之初步。豈非科學中大發明。其治法惟以潛陽鎮逆爲主。使氣血不上升。腦不受激。則洶涌波瀾。頓然平定。但從大處落墨。披大郤。導大竅。一切兼證。無不迎刃自解。日月出矣。燭火俱熄。乃令讀者陡然覺悟。心目爲之清明。惟是內風上擾。必挾胸中痰濁。隨氣而升。故當昏瞶眩仆之時。痰湧涎流。十恆八九。臨時急救。必以泄降濁痰爲第一要義。而滋膩藥物。多非所宜。伯龍知參朮壅氣之不可誤投。而反欲以二地阿膠。與鎮逆潛陽並進。尙是未達一間。此則誤讀立齋景岳諸書。未免賢者之過。同學張子山雷。早棄儒冠。彈精醫術。讀書萬卷。寢饋廿年。閱歷既多。具有心得。能以古書供其運用。而不爲古人所愚。每謂中風一病。古今議論。都無眞解。獨於伯龍之類中

祕旨一篇。服膺最摯。第微嫌其鎮肝滋腎。不分次序。則當氣升痰塞之時。黏膩適以助壅。難收潛降攝納之功。乃爲之分別緩急。條舉治法。而先引證古籍。辨明內因外因。羅羅清疏。如指諸掌。然後是病之來源去委。昭然若發蒙。書成二卷。名曰斟詮。斟不平者而使之平。洵爲治是病者絕無僅有之正鵠。伯龍開其源。得山雷氏導其流。於是臨證處方。銖兩悉稱。而今而後。內風暴動之變。始得廬循續命之湯。裨益於醫界病家。必非淺眇。惟其辨正古人之誤。雖以金匱甲乙。舉世所共知爲醫學大宗者。皆在糾繩之列。翻盡古人成案。猶恐篤信好古之儒。或有疑其持論太奇。未敢輕信者。要之內風外風。在素問顯有區別。至金匱而始以內風諸證。皆作外風。殊非素問所謂中風之眞旨。卽據素問以正漢唐之誤。而金匱甲乙諸書。不得不謂其自有誤會。況乎今之實驗。既有明徵。則古之成方。信多貽禍。民命至重。詎可不辨。此事實之不能模稜兩可者。初非炫異矜奇。好與古人作無端之饒舌也。若以介類潛陽之品。專治氣火上浮。肝陽內動之病。則宋人許學士眞珠母丸。已開其例。

近賢孟英王氏。頗擅其長。文彥業師吳門黃醴泉先生。亦喜用之。龍牡龜鼈貝齒珠母玳瑁之屬。連類而書。不嫌複疊。鎮攝之力。視伯龍所言。殆十倍之。而其力始專。其效尤著。狂瀾砥柱。乃可撐撐。山雷此編。固以伯龍之論。觸類旁通。闡幽燭隱。而得此絕大之覺悟。然專倚介類以建殊勳。蓋卽從孟英醴泉諸家之治案悟出。非拘拘於伯龍一家言者。且專用潛鎮以定內風。亦非伯龍本旨。蓋伯龍意中。固欲以潛降與滋填並進也。此山雷之縝密。固有較勝於伯龍者。青出於藍。洵非虛語。而孟英諸家之治驗。殆其旁證之得力處耶。山雷又有古今醫案平議之作。亦將就緒。其腦神經病一編。採集近賢治案。可見一班。敢書所見。以質山雷。其以爲知言否。僭加評隲。并爲點句以歸之。尙其速付手民。喚醒俗學。俾呻吟牀簀者。早得鍼膏盲而起廢疾。則書生之有用於世。功德亦不爲小矣。爰敘涯略。以告世之治此學者。要亦醫林之一大關鍵。非鈔胥家所可同日語也。吾道中不乏讀書明理之才。必不以鄙言爲阿私所好。時民國六年辰在丁巳冬十月同學弟同邑張文彥洛鈞氏序於滬城寓居之半廬